



**Bed and Breakfast
“Het Kabouterneest”**

Gedichten Ina Snijder
Illustraties Dore Mulder

Bed & Breakfast Het Kabouterneest

Wat der an veuraof gung.

Wij waren in het bezit van een hiele lieve Duutse herder. Daogeliëks luupen wij rondum en deur Vries. Op ien van die wandelingen, vuul mij in ien keer een boom op, waoras underan een soort inhammegie zat, wat nét op een deurtie leek, die op een kiertie stun..Toen vleug mien fantasie op hol en zag ik daar maor zó twee kabouteries een Bed & Breakfast bestieren. Het Esveen in Vries is een prachtig verstild plekkie, dus ideaol veur (kabouter) toeristen. Het wur der drok en ze beleefden van alles. Dit kuj lezen in de volgende gedichten.

Het bent der een stuk of 12 op dit moment, maor ik kan der zo weer wat bij verzinnen. Toen ik der met begon, dee ik dat um ze veur te lezen op de schoelen. Dit lukte in 2019 nog wel, maor toen kwam Corona.

In die tied bedacht ik, dat de kinder wél boeten muchten wezen en dat wij dan wél op afstand boeten heur een verhaoltie veur kunnen lezen. Wij waren in oeze gemiente met zun 12 taolvrijwillgers en ik dacht, as wij nou rondum het Esveen gaon zitten, een eindtie oet mekaor en dan elk een kabouterverhaoltie veurleest dan wordt dat toch hiel gezellig en mooi veur de kinder. In plaots van, dat wij naor de kinder toe gaot, komt ze bij oes.

Deurdat het corona was, har ik wel tied um gedichies te maoken, dus dat kwam goed. Elk en ien wol wel met doen, dus dat kwam ok goed. De Vijverstee en de Zeijer Hoogte wollen ok graag metdoen...dus het gung deur!!! Ok har ik het liedtie van Danny Vera, Rollercoaster een stukkie in het Drents vertaald en een bevriende gitarist en mien schoonzus en mien vriendin verwelkomden hiermet de kinder. An het eind van de gedichtentoer namen ze op dezelfde maneer afscheid. Ok har ik van het VVV paddestoelen e.d. kregen, zodat daar de weg met wezen wur. Het leek dus nét een speurtocht. De veurlezers hadden zölf een klein tafereeltje maakt, waor hun gedichie over gung. Kuj op een dienblad of zo doen. Wij deden dit in september 2021, het was prachtig weer en iedereen vun het GEWELDIG.

Dizze gedichies speult zich aof in Vries, maor elk dörp hef wel een veentie of viever en zó kuj het overal op dizze maneer doen. Zo heb wij het ok in Zeijen en in Zuudlaorderveen daon. Ik wul altied wel helpen met de dichtvorm. Ik zal de zangteksten der ok bij doen, het is wel mooi met muziek erbij.

Ik wens elk veul plezeer met dizze gedichies.

Inhoud

Bed and Breakfast 'Het Kabouterneest'	3
De Verbouwing.....	5
Oompie Fred.....	6
Naomsbekendheid	8
Anmeldingen	10
Vekaansie	11
Het Lappenmaandtie.....	12
Romantiek in B&B Het Kabouterneest	13
Taante Toos	14
Winter op het Esveen.....	18
Zwemwedstried in het Esveen	19
Muziekklinken klinken over het Esveen.....	21
Bijlages Muziek.....	23
Welkomstlied	23
Afscheidslied	24



Bed and Breakfast 'Het Kabouterneest'

Argens underan een dikke boom bij het Esveen...

Stiet het hoesie van kabouter Joppie Vlotterbeen.

As Joppie thoes is stiet zien deurtie miestal op een kiertie,

Dan hef e vaak bezuuk van een vogelie of een aander diertie.

Vandaag hef Joppie zien deurtie een eindtie wieder open zet,

Want hij verwacht nog bezuuk van zien oompie Fred..

Die ree vanmörge al hiel vroom op zien ziedspannegie Zeijen oet,

En zal der straks wel an kommen racen, want dat kan e meraokels goed!

Joppie hef zien hoesie mooi an kaant,

Alles blinkt en op de vloer lig hiel mooi wit zaand..

Het eten stiet ok al in hiele kleine pannegies klaor,

Ze wult vanaovend goermetten moej weten, vandaor...!

Nao het eten wult ze meteenbeidend an het klussen,

Ze gaot der een kaomerie bij maoken met een mooi bried berre en een hiel zaacht gaansedonsen kussen..

Het is de bedoeling, dat ze dit kaomerie gaot verhuren,

Volgende week wult ze de folders rondsturen..

De naam van Joppie zien verbouwde hoesie wordt dan HET KABOUTERNEEST,

Drenthe's állerkleinste Bed and Breakfast!

Der zal vast wel veul animo veur wezen,

As der gien kabouters komt, dan komt der beslist wel mussen, mollegies,
moesies of mezen...

Want veur een lekker waarm berre, een zaacht kussen met een plakkie stoet
derbij,

Staat de mieste dierties in de rij.

Wij wenst Joppie Vlotterbeen en Oompie Fred veul geluk met dit neie project.

En hoopt, dat het deur hiel veul kabouters wordt ontdekt.



De Verbouwing

Oompie Fred en Joppie Vlotterbeen hebt de boel hiel rap verbouwd,
Toen het kaomerie klaor was, hebt ze alles der gauw weer in sjouwt.
Een taofelie, wat rieten stoelties en een hiel groot berre,
Staot mooi te wezen in het neie kaomerie met angrenzende serre.
Alles hebt ze anpakt, niks is vergeten,
Het hiele hoes is weer van top tot toon an kaant, aj wult, kuj der van de vloor eten.

Gelukkig is alles op tied klaor,
Want ze hebt straks lös hoes, vandaor...!
Oompie Fred is net op zien ziedspannegie vertrökken naor zien eigen hoes,
Dan kan hij daor nog gauw even under de douche.

Joppie hef binnen alles an kaant,
Hij zet nog even een bossie bloemen op taofel, die hij vanmörge plukt hef op boer
Boersmao zien laand,
Nou zal e boeten nog even an de gang gaon,
Aans hef e Oompie Fred en alle aandere gasten der zó maor staon!!

Oompie Fred

Dit is het hoesie van oompie Fred,
Hij hef zien ziedspannegie nét oet de garage zet.
Bij hum is het ok zo schoon, daj wel van de vloer kunt eten,
Dat komp zo, hij hef vrogger op de grote vaort zeten.
Daor gung hij altied met de kippen op stok,
Want hij was van beroep naomelijk scheepskok.

Nao al dat zwalken op de grote plas,
Is oompie Fred met zien mooie hoesie hielemaol in zien sas!
En as e dan op zien ziedspannegie deur Drenthe knort,
Is het net, asof e aal jonger wordt...

Intussentied in Vries...

.... hef Joppie bij het Esveen de picknicktaofel in örde maakt,
Zodat de gasten kunt pruuven hoe as de stoeties smaakt...
Nog even een pot thee en een kan kovie derbij,
Wat kannegies melk en een paor schaolties met klonties kandij...

Zo, nou maakt e der nog gauw even een foto van,
Um die op Facebook te delen met zien achterban!
Joppie is zölf aorig tevreden met het resultaat,
Wacht is....hij heurt allemaol reurigheid op straot...

Oompie Fred komp met een noodgang in zien ziedspannegie de bocht um zetten...

Hij röp: “ik heb hier allemaol luu, die bij oes wult slaopen en stoet eten en goermetten...”

“Dat kan!”röp Joppie terug,

“Maor dan moe wij wel weer an het verbouwen, dit giet wel aorig vlug!”

Veur dat ze het wussen kwam mij daor toch een feesie op gang..

Het duurde wel twee daogen en twee nachten lang!!

Toen bint Joppie Vlotterbeen en Oompie Fred muuj maor voldaan,

Elk naor heur eigen berre gaon.

Naomsbekendheid

Joppie Vlotterbeen en Oompie Fred van B&B HET KABOUTERNEST,

Bint meteenbeidend op RTV DRENTHE wést!!

Ze zaten zomaor pardoes,

In de Volkswaogen Kever, van Toer de Loes!

Wat hadden ze een plezeer, de praoties waren niet van de locht,

Loes vleug van het lachen bijna oet de bocht!!

Maor wat een reklaome muken ze zó,

De anvroagen um in heur B&B te kommen logeren kenden hielemaol gien hó!!

Zo hadden Kees kabouter en zien vrouw Mien,

Dit leuke programma ok zien...

Kees zee tegen zien vrouw:" daor gao wij hén, naor Drenthe, richting ESVEEN

Ik spreek votdaodelijk een daotum aof, met Joppie Vlotterbeen".

Zo gezegd, zo gedaon,

Vandaag bint ze met heur Cabriootje op pad gaon..

Och, wat vind ze de omgeving prachtig,

Wat een rust hier, gien iene is drok of jachtig..

Umdat ze nogal een toertie rieden moet,

Stopt ze onderweg even veur een oetsmieterie op een plakkie stoet.

As ze dan eindelijk HET KABOUTERNEST in de verte ziet,

Geleuft ze heur eigen ogen niet...

Daor stiet het B&B- tje mooi te wezen in al heur pracht!

"Och Kees, wat fantastisch!"zeg Mien zacht...

Het deurtie stiet al op een kiertie,

En Oompie Fred en Joppie Vlotterbeen staot boeten met in heur haand een kold alcohol-vrij biertie,

Ze zegt: "welkom in HET KABOUTERNEST,

Drenthe's állerkleinste Bed & Breakfast."



Anmeldingen

Je staot der gewoonweg hielemaol van versteld,
Hoeveul kabouters, dierties en vogelies zuch allemaol anmeld,
Um op pad te gaon, naor die mooie holle boom, daor bij het Esveen,
Welke wordt bewoond deur Joppie Vlotterbeen,
Die an een ieder hef laoten weten,
Daj bij hum de lekkerste stoeties kunt eten,
En ok um te blieven slaopen, bin je bij hum an het goeie adres,
Je kunt reserveren via Facebook, de app of per sms!

Vekaansie

Kabouter Joppie Vlotterbeen en Oompie Fred maakt een daansie,

Want ze gaot meteenbeidend op vekaansie!!

Het ziedspannegie stiet al te blinken in de zun,

Klaor veur vertrek naor het campinkie in het mooie dörpie Bun.

De B&B giet een weekie dicht,

Joppie en Oompie Fred gaot genieten van de zun op heur gezicht!

De helmpies op en de leren pakkies an,

Wat benzine in het tankie en daor gaot ze dan!

De vogelies en de aander dierties zwaait heur oet,

Ze roept: "wij past wel een beetie op de B&B, het komp allemaol goed!!"

Het Lappenmaandtie

De Vekaansie van oeze beide kabouters zit der weer op!

Wat hebt ze geneuten, het was in ien woord... top!!

Nou moet ze weer drok aan het wark, want de B&B zit tot aan de winter vol,

De gasten weet allemaol het padtie te vinden, even oet de sleur, even oet heur hol!

Oompie Fred reist dagelieks van Zeijen naor Vries,

Zien ziedspannegie vollaoden met stoeties en brummels en eerbeien drag e in zien karbies.

Met heur beiden maakt ze dan bulten lekkers klaor,

Wat dan weer opeten wordt, deur al die vakaansiegangers daor!!

As der wat over is, dan giet dat naor het lappenmaandtie,

Dat is een hiel klein pietepeuterig ledikaantie,

Waar soms een hommelië in lig die muuj is van het hoogvliegen,

Of een lieveheersbeestie die zien stippies niet op örde kan kriegen.

Een vlinder die maor veur ien nachtie blèf,

Of een knientie die zien pootie verstoekt hèf.

Allemaol dierties die even wat rust neudig bint,

En hier een bescharmd slaopplekkie vindt.

Zó doet Joppie Vlotterbeen en Oompie Fred dat,

Heur B&B "Het Kabouterneest" is veur elkenien een waarm bad!

Romantiek in B&B Het Kabouterneest

Der bint in een kört poosie tied al hiel wat gasten in de B&B west,
Ze bint allemaol geweldig te spreken over “Het Kabouterneest”!
Het is een kommen en gaon van kabouters, vogels, vlinders en gao zo maor deur,
Het gef de straot bij het Esveen wat reurigheid en hiel veul kleur!
Het plekkie is deur oeze kabouters hielemaol op de kaart zet,
Ze wordt binnenkört zölfs ansleuten op het glasvezelnet!

Och en dan was daor ok nog het verhaol van dat gezin lieveheersbeesies dat kwam logeren...

Die wollen ok wel ies zun zaacht berre oetproberen.

's Aovens gungen ze eerst goermetten,

En naotied gungen ze met heur volle lievies nog even een poosie kwartetten..

Iniens waren ze heur oldste dochter Liesje kwiet...

Ze gungen op zuuk en heurden in de verte een hiel mooi lied...

Daor zagen ze heur Liesje staon,

Ze was stiekem naor “Het Lappenmaandtie” gaon,

En daor har ze Guusje ontmoet...

Hij har wat last van zien stippies, maor zingen dat kun e barre goed!!

Hij zung heur met zien mooie stemmegie toe,

Vlieg met mij met.... En zeg DAG tegen je vao en moe!

Liesje kun zien zangkunsten niet weerstaon,

Zwaaide nog even en is saomen met Guusje de wiede wereld in gaon..

Zo zie je maor weer, romantiek op zien best!

In B&B Het Kabouterneest!

Taante Toos

Een beetje verstopt achter een hiele mooie roos,
Woont Joppie Vlotterbeen zien lievelingstaante, heur naam is Taante Toos.
Toosje Tuunkabouter hèt ze voloet,
Ze hèt mooi blond haor en altied een lachende snoet!

Toos is trouwd met kabouter Bram,
Die komp oorspronkelijk oet Rotterdam,
Maor wat is e bliede dat e nou in Vries bij het Esveen woonachtig is,
Want die file's in de Randstad dat is toch ok echt gien katterpis!

Hij hèt ok een ziedspannegie in zien garage staon,
Zodat e saomen met zien Toosje op pad kan gaon..
Toos vuult zich hiel geëmancipeerd
En hèt daorum ok het rieden op de ziedspan leert!

Maor vandaag komt Joppie en oompie Fred bij heur beide op vesiet,
Daorum zingt Toos nou het hoogste lied!
Nog even met de stofzoeger der deur..
Alles stiet klaor, de thee is al op kleur..

Iniens is der een oorverdovend lawaai te heuren,
Het bint Joppie en oompie Fred, die in heur ziedspannegie de bocht um komt
scheuren!!
Bram zat nog even bij het veentie te vissen,
Hij heurt het geluud van de motor en denkt: "daor bint ze, dát kan niet missen!!"
Hij löp gauw naor hoes, de vesite zit al bij zien lieve Toos,

Ze zit met mekaar boeten op de tuunstoelties onder die mooie roos...

Ze geniet van mekaar, van het mooie weer,

Van de thee en de gebakkies en aal zowat meer..

Dan is het weer tied um op hoes an te gaon,

Het ziedspannegie giet weer op de baon!

En met een gebrul van 'kweetniet hoe,

Gaot Joppie en oompie Fred weer naor "Het Kabouterneest" toe.



Oerend Haard!!!

Joppie Vlotterbeen en Oompie Fred bint met het ziedspannegie op de TT baon beland.

Oompie Fred wol metdoen an de ziedspanraces, maor Joppie stun al nao honderd meter met zien kop in het zaand!!

Alles is gelukkig met een sisser aoflopen, maor dat har veur hetzelfde geld wel aans kunnen wezen,

Dat die Oompie Fred ok altied zo haard mot racen.....

Zie kregen daor nog wel kennis an een paar Amerikaonse motorrenners,

Die te boek stunden as rasechte Bed&Breakfast kenners,

De beide motormoezen wollen het zaachte berre van Het Kabouterneest wel ies even oetproberen...

Nou zee Joppie, kom maor met oes mét, dan kuj nog is wat van oes leren...

De iene heette John en de aander zien naam was Mike,

Ze waren in Assen op de TTbaon an het trainen veur de Superbike.

Heur pap en mam waren vrogger naor Amerikao emigreerd,

Zodoende waren ze het Drènts niet verleerd...

En pruten ze zó met mekaor weg,

Mike vruug: 'hej de chickens an de leg''

Ja zee Joppie, elke dag verse eier veur een oetsmieterie op een plakkie stoet,

Dat bevalt oes duvels goed!!

En how doe joe doe dat met het middageten dan?

Daor zörgt Oompie Fred veur, hij reurt daogelieks in de pan!

De Amerikaonen wurden zó goed onthaolt, deur Joppie Vlotterbeen en Oompie Fred,

Dat ze de Bed & Breakfast in het Guinness Book of Records hebt zet!!

Want dizze twee waren overal in de wereld al wèst,
Maor nargens vunden ze zún kleine Bed & Breakfast!

Die twee kabouters met heur B&B naobij het Esveen wint dus zomaor een mooie
pries,

Ze wordt nog nét niet eigenwies,

Maor dat ze goed an de weg timmert, dat snapt elkenien,

Ze viert het met elk een glazzie bubbelieswien!!

De Amerikaonen zegt: "wij doet een toast!"

Joppie en Oompie Fred heft het glas en zegt allènnig maor: "Proost!!!"



Winter op het Esveen

In Bed en Breakfast, Het Kabouterneest is het een drokte van belang,
Der staot allemaol ski's en skistokken in de gang,
In de zomer is het hier in de natuur, geweldig mooi um te wezen,
Maor in de winter kuj hier ok nog es skiën en over het ies hén sjeezen!
Kabouter Joppie Vlotterbeen en Oompie Fred,
Hebt een nei wintersport-oord op de kaart zet!

Verscheidene kabouters hebt zuch op weg naor het Esveen begeven,
Ze harren der zin an um mooie ski- aoventuren te gaon beleven..
In het kaomerie van Joppie Vlotterbeen maakt een ieder zuch klaor,
Flanellen underbroekies, gebreide börstrokkes en dan de skipakkies, laog veur laog
over mekaor.,
Het Esveen is umtoverd tot kabouter-skigebied,
Wat hebt ze het allemaol naor de zin, zie zingt en jodelt heur hoogste lied!
Langlaufen, snei-boarden en der is zölfs een mooi klein ski-schaansie,
Alles is dus in hoes, veur een prachtige wintersport-vekaansie!

Bij de koek en zeupie tent is het een kommen en gaon,
De ketel met waarme sukkelaomelk hebt ze de hiele dag op het vuur staon,
Ok bint der lange slierten scheuvelopers op het Esveen anwezug,
De miesten doet de 5 kilometer, dat hold ze waarm én bezug!

Dus ok veur de wintersport huuft de kabouters niet naor het boetenland,
Zó dichtbij en zó mooi, Het Esveen in het mooie dörpie Vries, een witte wereld met
een golden raand!

Zwemwedstried in het Esveen

Het is zomer en kabouter Joppie Vlotterbeen hef een zwemwedstried op touw zet,
Daor waren hiel veel Esveen bewoners bliede met!!
Want, kabouters, eenden, kikkers en zólfs de vissen,
Wollen dizze wedstried veur gien gold missen!!

Ze konden kiezen tussen börstkraol, schoelslag of vlinderslag
En de start was op een mooie zaoterdag..
Elkenien was an het trainen veur dit evenement,
Ze konden zich umkleden in een mooie gekleurde tent,

Het trainen gung de hiele week deur
En zaoterdags stön elk der toppie veur!!
Toen Joppie het startschot dee klinken,
Was der gien iene die zich luut zinken...

Met een noodgang zwommen ze met mekaar over het Esveen,
Naoeken deur Joppie Vlotterbeen...
Oompie Fred stun met zien stopwatch an de aander kaant,
Met een hieleboel handdoeken bij de haand.

Het was Toosje tuunkabouter die met de overwinning an de haol gung...
Dit kwam, omdat ze per ongeluk op de rug van een snoek sprung..
Toen gung het wel zo snel, het was haost niet aof te zien,
De rest kwam pas nao een minuut of tien..
Toos kreeg een mooie medaille en de snoek kreeg een lekkere regenwörm,

Elkenien kwam heur filisteren, het luup gewoon störm!!!



Muzieklanken klinken over het Esveen

Kabouter Joppie Vlotterbeen en Oompie Fred,
Bint altied ién aovend in de week bezét..
Beiden bint naomelijk lid van de Esveense Harmonie,
En al kriegt ze lánng niet alle muziekneuten under de knie,
Ze hebt een hiele bult plezeer,
En dát smaakt vanzölf naor meer!

Op een aovend zee Oompie Fred tegen Joppie,
Ik heb wat bezunders in mien koppie!
Joppie kék Oompie Fred neisgierig an,
Wát haj bedaacht Fred, kom der maor ies met veur de dag dán!
Ik wol wel saomen met jou en oeze harmonie een groot concert gaon geven, ik dacht
zo omstreeks mei,
Het is hier zó stil de léste tied, dat brengt weer ies wat leven in de brouwerij!!

Bliksiekaoters zeg Joppie, dát is een meraokels goed plan!
Neudig jij elkenien oet dan?
Wij moet trouwens wél votdaodelijk met mekaor an het repeteren,
Want veur een concert moei een bult liedties oet de kop leren!!
En as alles dan klinkt, zoas het klinken mot,
Dán geef wij een concert waor elkenien nog lang over naopraot!

Och man, ik krieg der toch zun zin in zeg Joppie tegen Oompie Fred,
Dit wordt iets hiel moois, de omgeving, het waoter, de muziek...in ien woord: VET!
Dus aj je in het veurjaor een beetie verveeld,
Kom dan naor het concert bij het Esveen, het kreg de naam: Geluud in Beeld.

Tot zo ver!

Hier holt de verhaalen over Joppie Vlotterbeen en Oompie Fred eerst op,
Ze kriegt nog steeds hiel veul logees en staot met heur B&B hielemaol an de top!
Volgend jaor heur jullie vast nog meer van dizze beide,
Want ze gaot de boel nog oetbreiden, met een prachtige speelweide!
Dit was het eerst maor weer,
De beide kabouters groet jullie en zegt:

Tot een aander keer!

Bijlages Muziek

Welkomstlied

Hier gao wij naor het mooie drentse padtie in,

We vuult oes goed en hebt zun zin,

We ziet wel wat der komp,

En daor zie wij prachtige kabouters staon, Wij weet nou waor wij hèn zult gaon,

Wij heurt wel wat der komp....

Daor is 't mooi en daor is 't goed,

Het zunlicht komp oes tegemoet,

Wij heurt praoten wij heurt zang..

...en wij hebt plezeer, wat wul wij nog meer

Dus gao maor met,

Met oes naor de kabouters toe, Luuster

maor dan heur je hoe,

Zij hier van alles doet.

(Op de wijs van Roller Coaster van Danny Vera)

Afscheidslied

Dit is 't einde van dizze mooie luusterreis,

Volgend jaor doe wij 't vanneis,

In dizze mooie taol,

Wij zweigt je oet

En hoopt je n og ies weer te zien,

Bedankt hierveur en bovendien....

.....tot een aander maol....

(ook op de wijs van Roller Coaster van Danny Vera)



